

**Uunga siunnersuut: Sulisoqarnermut akitsuut pillugu Inatsisartut inatsisaata allanngortinneqarnera pillugu Inatsisartut inatsisaat nr. xx af xx. xxx 2020-meersoq**  
(Aningaasaqarnermut Naalakkersuisoq)

**Saqqummiussissut**

**Siullermeerinninneq**

Naalakkersuisut sinnerlugit matumuuna sulisoqarnermut akitsuut pillugu Inatsisartut inatsisaata allanngortinneqarnera pillugu Inatsisartut inatsisaannut siunnersuut saqqummiutissavara.

Siunnersuut taamaalilluni annertunerpaatigut naartunermi, erninermi meeravissartaarnermilu sulinngiffeqartarneq ullormusiaqartarnerlu pillugit Inatsisartut inatsisissaannut nutaamut siunnersuutip toqqaannartumik malitsigaa. Namminersorlutik suliffeqarfiutilinnut erninermi aningaasaateqarfimmik atuutsitsisoqalissasoq, Inatsisartut inatsisaanni nutaami siunnerfigineqarpoq. Aningaasaateqarfiup naammattumik aningaasalersornissaa qulakkeerniarlugu siunnersuutigineqarpoq, suliffeqarfiutillit namminersortut aningaasarsiarititamik katillugit aningaasartaannit akitsuummik akiliisussanngortinneqassasut. Akitsuutip annertussusaa, aningaasaateqarfiup aningaasartuutai aammalu isumannaatsumik ingerlanneqarnissaa eqqarsaatigalugit, ukiut tamaasa aningaasanut inatsimmi aalajangersarneqartassaaq.

Namminersorlutik suliffeqarfiutilinnut atatillugu erninermi aningaasaateqarfik naligiissaarinnermut aningaasaateqarfiussaaq assigiimmik pisussaaffeqarfiulluni erninermut atatillugu sulinngiffeqarnermi akissarsianut aningaasartuutit namminersorlutik sulisitsisut tamarmiusut akornanni naligiinnerusumik agguataarneqarnissaannik qulakkeerinnittoq. Erninermi aningaasaateqarfiup suliffeqarnermi naligiissitaaneq pitsaanerulersissavaa, ilaqtariit meerartallit erninermut atatillugu sulinngiffeqartoqarnerani pilersuisinnaanissamut naammaginantumik tunngavissaqalersissallugit aammalu inuuniarnermik attassisinnaaneruneq, aningaasaqarnikkut patajaassuseq aammalu nunatsinni suliffeqarfiit unammillersinnaanissaat qulakkiissallugu. Naalakkersuisut isumaat malillugu tamanna ilorraap tungaanut pitsaasumik alloriarneruvoq pingaaruteqartoq.

Sulisoqarnermut akitsuut pillugu Inatsisartut inatsisaanni § 2, imm. 4-mi aalajangerneqarpoq, soraarnerussutisiaqalernissamut aqqissuussinernut ilanngaatiginninnissamut pisinnaatitaaffiusunut aalajangersimasunut akiliutinit sulisoqarnermut akitsuummik akiliisoqartassanngitsoq. Taamatut ilaatitsinnginnissaq, aamma soraarnerussutisiaqalernissaq siunertaralugu akiliutinut atuutsilerlugu, annertusitinneqassasoq siunnersuutigineqarpoq. Taamaaliornermi soraarnerussutisiaqarnissaq siunertaralugu ileqqaarnernut akiliutit,

soraarnerussutisiaqalernissanut aqqissuussinernut ilanngaatigineqarsinnaatitaasunut allanut akiliutinut, naligiissinneqassapput.

Naggataatigut inatsisissatut siunnersuut aamma nassuiaatit tassunga tunngasut innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartuni suliassanngortippara.